

Invit ad ina spassegiada en Val d'Avras e Madris

Passa 40 preschentaziuns en l'onn giubilar dal fond per la cuntrada

■ (anr/vi) Il Fond svizzer per la cuntrada mussa tge ch'el presta: La proxima dumengia envida el ad ina spassegiada sin la via veglia d'Avras ed en Val Madris. En questa regiun ha il fond sustegnì il mantegniment da vias, punts, piogns, tschalers, stallas ed in tetg crap per ina stalla nova. Durant ses onn giubilar organisescha il Fond svizzer per la cuntrada (FSC) passa quaranta talas spassegiadas u preschentaziuns en l'entira Svizra. Quella da la proxima dumengia cumenza a las 08.50 avant il bogn ad Andeer. Sco emprim vai cun

auto da posta en Val d'Avras. Durant viandar sin la via veglia explitgescha *Oskar Hugentobler* da l'uniun «alte Averserstrasse» tge lavurs ch'ins ha fatg fin uss per mantegnair la senda e tge ch'ins planisescha anc. Suentar datti in puschegn da purs tar la famiglia Loi a Cröt. Lura maina *Jürg Stoffel* ils participants en Val Madris. Là mussa il president da l'uniun per ils logs culturals la punt, tschalers e la susta ch'ins ha salvà cun agid finanziel dal fond. Da la partida vegn er ad esser *Regula Ott*, commembra da la cumissiu dal FSC.

Engaschi dal FSC en il Grischun

Atgnamain è il FSC in «regal» ch'il parlament aveva fatg il 1991 a la Svizra per las festivitads da 700 onns confederaziun, scriva l'organisaziun en sia comunicaziun. Il cussegl naziunal ed il cussegl dals chantuns hajan vulì stgaffir insatge da «valor durabla»: Il FSC ha l'incumbensa da gidar a mantegnair u revalitar cuntradas culturals. Entaifer ils 25 onns da sia existenza ha il fond promovì radund 2360 projects cun en tut 140 milliuns francs.

En il Grischun han ins impundi 17 milliuns francs. Suentar il Tessin saja il Grischun pia sin il segund plaz areguard l'engaschi dal FSC, stat scrit en la comunicaziun. Il pli grond daner per projects grischuns han ins concedi per sanar mirs sitgs en il Puschlav, per lingias d'electricitad sutterranas sin l'Alp Flix, per la cuntrada Val dal Rain e per il mantegniment da la veglia via d'Avras sco senda istorica da muntada naziunala. En la cumissiu dal FSC hai fin uss adina gi in commemor grischun: *Diego Giovanoli, Silva Semadeni, Robert Kruker* ed uss *Regula Ott*.

Anc autras spassegiadas

Ils 6 d'avust porscha il FSC in'ulteriura spassegiada en il Grischun, ina visita guidada dal Giardino dei Ghiacciai di Cavaglia. En il curtgin da glatscher dal Puschlav pon ins contemplar las furmas che glatschers ed auas han isà durant tschientaners en gripa e chavorgias.

Per la spassegiada en Val d'Avras e Madris pon ins s'annunziar tar hugentobler_forsting.eth@bluewin.ch. Dapli infurmaziuns chattan ins sin fls-fsp.ch.



La veglia via dad Avras maina sur la punt da l'aua che sburfla ord la Valle di Lei.

Qua maina la via atras Furra. Prest arrivon ins ad Avras Cresta.

FOTOS O. HUGENTOBLER

